

Ick lähr di dat af

Fast ölle Mensken hät irgend äine Liebhaberigge. De äine häf Duben up'n Dacke, de annere häf'n Rürn, de drüdde spellt Foutball un de veerde Skat. Willem häilt't met'n Skat. Dat wör ock nicks Leiges wian, wenn he'n Enne hedde fien'n konnt. Owwer wenn he't up'n Liewe hadde, dann vogatt he ölls. Dusendmaul han'n sinne Fruwwe öll seggt, he soll wäinigestens pünktlick ton Erten no Hus henkomm'n. Se woll auk in'n Hushalt förrig wärn un nich ümmer up än lurn.

Et holp nicks, et bleif bi de Bummeligge. Do gaf Willem sinne Fruwwe de Hoarpnung up, dat met Wore wat to erreichen wör. Se sann up annere Mittel un siar dann äines Dages, öll Willem we ton Skatspelln inne Wirtschaft ging: „Wenn du hüte nich pünktlick ton Erten kümms, dann bringe ick di dat bi.“ Willem grinse son betten ungläubig vo sick hen un dachte, kür du män tou, owwer sinne Fruwwe mäine: „Et is mi ernst, bummels du we vonmiddage, dann lähr ick di dat af.“

Et word twerlf Uhr, et word äin Uhr, un Willem dachte ümmer no nich doan, dat sinne Familge to Hus up än lur.

Et voking no ne halwe Stunne, do ging de Düar loß, un harin kamm Willem sinne twerlfjöihrige Tochter met't Deckelkoarf. Auhne äin Wort to seggen, ging dat Luet bi Willem an'n Disk, sette de Gliarser uppe Siete un kreig ut dän Deckelkoarf äin wittet Disklaken un decke dann dän Disk met Willem sin Middagerten. Willem keik gans vodattert tou un konn ers käin Wort harut bringen. Öll he sinne Sprauke wier hadde, fräig he: „Wat sall dat häiten, sin ji nich mä wies?“ Gans ruhig siar dat Kiend: „Mama häf mi schicket un häf seggt, man könne nich gout von di volangen, dat du ton Erten extra no Hus hen keims. Du soßt di män gout schmecken lauten. Dat Geschirr soll ick we metbringen ton afwaschen, domet wi dann auk Sonndag hen'n.“

Willem häf nie so tengern wat in'n Koarf packet, ölle he jetz dei. De Krüzsolo, dän he just inne Hand hat hadde, word nich mä spellt. He suse met Kiend un Koarf düar de Düar un vogatt sogar sinne Zede to betahln. Owwer von Tied an was Willem ümmer ton Erten pünktlick to Hus.